

Surat khabar: Berita Harian (Pendidikan)

Hari/Tarikh: 17/11/2016

Muka surat: 14

Tajuk : Graduan UNIMAS tepati keperluan industri

Graduan UNIMAS tepati keperluan industri

Kota Samarahan: Universiti Malaysia Sarawak (UNIMAS) perlu bekerjasama dengan institusi pengajian tinggi awam (IPTA) lain di negeri ini bagi merangka pelan pendidikan jangka panjang yang mampu memenuhi kehendak dan keperluan industri.

Pro Canselor UNIMAS, Tan Sri Alfred Jabu Numpang, berkata inisiatif itu diyakini berupaya membantu pihak pentadbiran universiti merangka program pengajian yang lebih menyeluruh, dengan mengambil kira pandangan pihak industri.

Kriteria pasaran

Katanya, usaha itu secara tidak langsung memastikan setiap graduan memenuhi kriteria pasaran pekerjaan, sekali gus mengelakkan mereka mengambil masa terlalu lama untuk mencari kerja yang bersesuaian dengan kelayakan dimiliki.

Fakta nombor

25 TAHUN

usia UNIMAS

700 PELAJAR

antarabangsa

“Ini dapat memastikan universiti melahirkan graduan yang bercirikan kehendak pasaran masa kini... dialog antara pihak industri dan akademik perlu terus mantap serta dinamik agar pembangunan negeri sentiasa berterusan,” katanya.

Beliau berkata demikian pada Sidang Kedua Majlis Konvokesyen UNIMAS Ke-20, di sini semalam yang turut dihadiri Naib Canselor UNIMAS, Prof Datuk Dr Mohamad Kadim Suaidi.

Jabu berkata, perkara itu juga sebagai langkah mempersiapkan graduan sejurus tamat pengajian mereka untuk menempuh alam pekerjaan dengan menilai tahap kebolehpasaran masing-masing.

“Namun, bila masuk ke alam pekerjaan, graduan harus ingat di luar sana adalah sangat mencabar yang bukan hanya memerlukan ilmu pengetahuan tetapi kemahiran insaniah,” katanya.



Jabu menyampaikan skrol ijazah kepada graduan pada Sidang Kedua Majlis Konvokesyen UNIMAS Ke-20 di Kota Samarahan, semalam.